

DOMINGU V TEMPU KOMÚN – TINAN B

TEMA

Sá loos sentidu sofrimentu no terus ne'ebé akompaña ema nia dalam iha rai? Sá loos Maromak nia “pozisaun” hasoru drama sira ne'ebé marka ita-nia ezisténsia? Liturjia Domingu V Tempu Komún nian reflète kona-ba kestaun fundamentál sira-ne'e. Maromak nia projetu ba ema la'ós projetu ida mate nian, maibé projetu moris loos nian, ksolok rohan-laek. Iha *leitura dahuluk*, fiar-na'in ida naran Job komenta, ho laran-susar no deziluzau, faktu kona-ba nia moris ne'ebé marka ho terus boot no sente Maromak dook no indiferente ba dezesperu ninia ezisténsia nian... Maski nune'e, Job dirije ba Maromak, basá nia hatene katak Maromak de'it mak ninia esperansa no lahó Nia la iha posibiidade salvasaun nian.

Iha *Evanjellu* hatudu Maromak nia preokupasaun ba nia oan sira nia ksolok. Iha Jezús nia asaun libertadora ba ema sira, hahú hatudu mundu foun lahó sofrimentu, lahó opresaun, lahó ezkluzau ne'ebé Maromak mehi ba ema sira. Testu sujere tan katak, Jezús nia asaun tenke kontinua liuhusi ninia dixípulu sira.

Leitura daruak subliña liuliu, obrigasaun ne'ebé Jezús nia dixípulu sira asume, katak, fô sasin iha ema hotu nia oin, Jezús nia proposta libertadora. Iha sira-nia hahalok no sasin, Jezús nia dixípulu sira labele husik interese pesoál mak gia sira, maibé domin ba Maromak, ba Evanjellu no ba maun-alin sira.

LEITURA I – Job 7,1-4.6-7

Livru Job nian mak klásiku ida literatura universál nian. Aleinde iha beleza literária estraordinária, livru ne'e apresenta reflesaun elaborada kona-ba kestaun boot ruma ne'ebé ema tempu hotu nian tau ba an rasik: sá loos sentidu moris nian? Ema nia situasaun iha Maromak nia oin mak ida-ne'ebé loos? Sá loos Maromak nia papél iha ema sira nia moris no nia drama sira? Sá loos sentidu terus nian?

Job, istória ne'e nia erói, tuir livru nia ema harohan-na'in, ema di'ak. Laran-luak no nakonu ho “hamta'uk ba Maromak”. Nia iha rikusoin wain no família boot... Maibé, derepente, nia lakon buat hotu, lakon família no hetan moras grave/todan ida.

Istória kona-ba Job nia drama sira serve atu introdús reflesaun ida kona-ba dogma ida fiar Israel nian: dogma retribuísau nian. Ba katekeze tradisionál Israel nian, Maromak nia atitude iha relasaun ho ema sira define tiha ona: Jahwéh fô rekompensa ba ema di'ak sira ba sira-nia hahalok di'ak no ema aat sira simu kastigu tuir injustisa no arbitrariedade sira nia hahalok nian. Tuir katekeze ne'e, Maromak nia justisa lineár, definidu, la muda, bele prevé, limita ba halo kontabilidade ba hahalok di'ak no hahalok aat ema sira-nian no selu sira tuir komportamentu sira ne'e.

Maibé vizaun “ofisiál” Maromak nian ida-ne'e no ninia asaun iha ema nia moris la tuir buat ne'ebé akontese iha moris. Dalabarak ema aat sira iha rikusoin barak ba moris naruk no haksolok, enkuantu ema justu sira kiak no sofre tanba injustisa no violénsia husi kbiit-na'in sira. Dogma ne'e remata, liuliu, tanba la la'o ho ema inosente nia terus: se ema di'ak ida, harohan-na'in, hamta'uk Na'i no moris iha observánsia ukun-fuan nian mak terus, oinsá esplika sofrimentu?

Livru Job nian reflète, kona-ba kestaun ne'e. Job la la'o ho teolojia tradisionál (iha livru, belun na'in haat buka esplika ba Job katak ninia terus mak rezultadu lójiku husi ninia

salan/falta sira) no, hahú husi nia esperiéncia rasik, denunciafiar ida harii iha prekonseitu no teoria abstrata ne'ebé la la' o ho moris. Nia la aseita ilas falsu Maromak nian ne'ebé teólogo profesionál sira mak kria, iha-ne'ebé Maromak mak komersiante ne'ebé selu tuir kualidade merkadoria ne'ebé nia simu...

Tanba nia labele aseita maromak falsu ne'e, Job buka Maromak nia oin loloos... nia buka ho paixun, iha terus, dalaruma marka ho rebeldia no revolta to'o nia hasoru "oin ho oin" ho Maromak. Nia deskobre Maromak ida kbiit-na'in, ema labele komprende no hakat liu ema nia lójika sira; maibé nia mós deskobre, Maromak nu'udar ida ne'ebé hadomi ho domin Aman nian ninia kriatura ida-idak. Nune'e, Job rekoñese katak nia ki'ik folin-laek, rekoñese ninia kbiit-laek atu komprende Maromak nia projetu sira. Job rekoñese katak nia labele komprende Maromak nia projetu sira, labele julga Maromak, julga Nia ho ema nia lójika. Ba Job, ema ne'ebé folin-laek no limitadu, hela de'it buat ida: saran an totalmente iha Maromak ne'e nia liman, inkomprensivel maibé nakonu ho domin, no konfia tomak iha Nia. Ida-ne'e mak ikusmai, Job halo.

Ita-nia testu integra parte sentráal livru nian. Entre 3,1 no 31,40, autór apresenta, ho forma poezia nian, diálogu ida entre Job (fiar-na'in polémiku, kontestadór) no belun sira (defensór teolojia no katekeze tradisionál nian). Iha diálogu ne'e, Job sei sobu argumentu sira katekeze ofisiál Israel nian; no sei hasai ninia insatisfasaun no revolta, iha dezafiu ida ba maromak falsu ne'ebé nia belun sira apresenta ba nia no Job ne'ebé lakohi simu.

MENSAJEN

Testu ne'ebé ohin propoin mai ita mak reflesaun ida Job nian kona-ba sentidu moris nian. Job hahú hodi halo konsiderasaun jerál kona-ba ema nia moris iha rai. Kuadru ne'ebé apresenta negativu liu... Atu hatudu oinsá moris ne'e susar, triste no todan, nia uza ezemplu tolu (vers. 1-2). Ezemplu dahuluk mak soldadu nia moris, ne'ebé hetan kondenasau ba ezisténcia ida funu/luta nian, risku no hakruuk/sujeisaun ba komandante. Ezemplu daruak mak atan nian, kondena ba moris ida serbisu nian, tortura no maltratamentu nian. Ezemplu datoluk mak traballadór, kondena ba serbisu iha lora nia okos, maski simu saláriu. Ne'e mak "estadu" tolu, ne'ebé iha tempu ne'ebá konsidera nu'udar todan liu ba ema nia moris.

Job konsidera ninia situasaun pesoál aat liután. Terus ne'ebé hakonu ninia moris todan liufali traballadór ida-nian iha to'os; ninia laran-triste todan liu fali soldadu ida nia funu no risku sira; ninia dezesperu todan liu atan ida nia moris sujeisaun nian. Job nia sofrimentu no deziluzau kontinua kalan no lora la fó deskansu ba nia, laho esperansa, hanesan traballadór ida nian atu simu nia kolen (vers. 3-4. 6).

Haktuir tiha ninia moris susar, Job dirije diretamente ba Maromak (vers. 7 ss) no husu ba Nia atu "hanoin" (iha konsiderasaun) ninia atan nia sitasaun triste.

Testu ne'ebé liturjia propoin mai ita remata iha ne'e... Maski nune'e, iha "orasaun" orijinal, Job kontinua hasae ba Maromak ninia situasaun triste (kf. Job 7,7-21). Job nia orasaun nakonu ho dezesperu, laran-susar no revolta hasoru Maromak ne'ebé inkomprensivel no prepotente ne'ebé lakohi hapara ninia belun Job nia drama. Job nia hakilar revolta nian suli husi fuan ida ne'ebé terus no laho esperansa no ne'e mak espresaun ema nia angústia ne'ebé, iha ninia mizéria, sente Maromak la halo justisa ba nia no kondena nia; maibé, ida-ne'e mós mak hakilar ida husi fiar-na'in ne'ebé hatene katak iha Maromak de'it mak nia bele hetan esperansa no sentidu ba ninia ezisténcia.

LEITURA II – 1 Cor 9,16-19.22-23

Problema sériu ida ne'ebé sarani sira Corinto nian hasoru (komunidade joven, moris no entuziazmu, maibé ho difikuldade rasik) mak problema han eh la han na'an ne'ebé hasae nu'udar sakrifisiu ba lulik sira.

Iha mundu gregu, templu sira mak matadouru prinsipál animál nian no oferese ba maromak sira. Animál nia parte ida sunu no parte seluk pertense ba amlulik sira. Naan ne'ebé restu, pesoál templu nian faan. Na'an restu sira ne'e bele hetan iha merkadu, no populasau sosa. Situasau ne'e hamosu kestaun ruma ba sarani sira: sosa na'an sira ne'e no han – nu'udar ema hotu halo – hanesan kompromete an ho kultu lulik nian. Ida-ne'e loos ga lae, bele ga labele? Ne'e mak kestaun ne'ebé halo sarani sira Corinto nian la hakmatek. Ba kestaun ne'e, Paulo hatán iha 1 Cor 8-10. Konkretamente, resposta mosu iha versíkulu ruanulu nia laran (kf. 1 Cor 8,1-13 no 10,22-29): tanba lulik sira la folin buat ida, la iha buat ida atu han na'an ne'e; maibé, tenke evita eskandaliza sira ne'ebé fraku, atu keta falta karidade ba sira.

Paulo nia resposta hakat liu kestaun ne'e no hasai prinsipiu jerál ida ne'ebé vale ba kazu ne'e no situasau seluk: buat ne'ebé fundamentál la'ós ha'u-nia direitu atu halo (iha-ne'e, han na'an oferese ba lulik sira), maibé atu ha'u-nia komportamentu hotu domin ba maluk sira mak tenke gia... Domin ne'e, iha sirkunstánsia ruma, ezije atu ha'u hakribi ha'u-nia direitu no ha'u-nia liberdade, ba ema seluk nia benefísiu (kf. 1 Cor 8,9-13).

Depoizde afirmasau jerál ne'e, Paulo fó ezemplu no konsiderasau konkreta sira... Nia rasik dalabarak hakribi ninia direitu sira, tan domin ba maluk sira. Maromak hili nia nu'udar apóstolu no, nu'udar apóstolu, nia bele husu ninia direitu sira no moris husi nia kolen ba Evanjellu... Maibé nia nunka ezije buat ida basá buat ne'ebé uluknanai preokupa nia, la'ós ninia direitu rasik, maibé komunidade no maluk sira nia benefísiu (kf. 1 Cor 9,1-15).

Iha-ne'e mak tama testu ne'ebé ohin propoin mai ita. Paulu esplika katak nia haklaken Evanjellu, la'ós ba interese rasik, maibé ba maluk sira nia interese.

MENSAJEN

Paulo hahú hodi deklarata katak haklaken Evanjellu, ba nia, la'ós título ida glória nian, maibé obrigasaun ida ne'ebé impoin ba nia (vers. 16). Ne'e mak afirmasau sorprendente ida... Entaun Paulo la haklaken Evanjellu livremente, maibé tanba obrigasaun? Defaktu nune'e duni. Husi momentu nia hasoru Kristu no rona ninia dezafiu, Paulo simu knaar atu evanjeliza. Nia fuan monu ba Kristu, ba ninia projetu libertasau nian ba ema tomak; no "paixau" ne'e obriga nia atu fó sasin Liafoun Di'ak Jezús nian. Bainhira ema ida hasoru Kristu no sai nia dixípulu, nia labele hela paradu de'it. Maibé tenke fó sasin... Espresau "susar mai ha'u se la haklaken Evanjellu" tradús imperativu ne'ebé Paulo sente no suli husi nia domin ba Kristu, ba Evanjellu no ba ema sira. Paulo evanjeliza tanba ninia inisiativa rasik karik, nia sei buka ninia kolen/rekompensa; maibé tanba domin mak obriga atu evanjeliza, kolen eh rekompensa ne'e la importante ba nia (vers. 17-18).

Prinsipiu fundamentál ne'ebé orienta mane ida-ne'e nia vida, apaixonadu ba Kristu no ba Evanjellu, la'ós ba ninia liberdade rasik, afirmasau ba direitu rasik eh defeza ba interese rasik maibé domin ba Kristu no ba maluk sira. Tan domin ni ahakribi nia dieritu hotu no halo nia an sai "ema hotu nia atan" (vers. 19); tan domin, nia hakribi ninia interese no perspetiva pesoál sira no identifika an ho ema fraku sira, sai "buat hotu ba ema hotu" (vers. 22-23). Buat ne'ebé fundamentál, buat ne'ebé desizivu, buat ne'ebé absolutu iha Paulo nia moris mak domin. Prinsipiu fundamentál ne'e mak tuir Paulo, tenke kondisiona sarani sira nia hilin no komportamentu hotu.

EVANJELLU – Mc 1, 29-39

Ita iha parte dahuluk (kf. Mc 1,14-8,30) Evanjellu Marcos nian. Evanjelista apresenta Jezús nu'udar Mesias ne'ebé haklaken realidade mundu foun ida nian – realidade ida ne'ebé Jezús rasik hanaran “Maromak nia Reinu”.

Ho dixípulu dahuluk sira nia bolun (kf. Mc 1,16-20), hahú atu konstitui comunidade “Reinu” nian – katak, comunidade ema sira nian, ne'ebé rona Jezús nia proposta no adere ba proposta ne'e. Tuirmai, Marcos hatudu realidade “Reinu” nian atu atua iha mundu nu'udar salvaun no libertasaun, iha Jezús nia liafuan no jestu sira: ho autoridade ne'ebé Aman fó ba Nia (kf. Mc 1,21-22) no iha komuñau total ho Aman, Jezús manán aat no terus ne'ebé halo ema sai atan no haklaken mundu foun ida liberdade no moris nakonu nian.

Jezús nia atuaun atu halo “Reinu” mosu, la'ós atuaun ida linita ba espasu sinagoga nian de'it (kf. Mc 1,21-28); nia haluan mós, ba ambiente no ámbitu seluk, basá “Maromak nia Reinu” ne'ebé Jezús mai propoin dirije ba ema hotu iha nia dimensaun tomak no iha situasaun hotu.

Evanjellu domingu ne'e nian situa ita iha Cafarnaum, sidade ida iha Bee-lihun Tiberíades nia sorin, iha Galileia.

MENSAJEN

Testu ne'ebé propoin mai ita apresenta Jezús ne'ebé halo “Reinu” sai presente iha ema sira nia leet. Evanjelista propoin mai ita kuadru rua, ho realidade lahanesan maibé komplementár kona-ba “Jezús nia ministériu”.

Kuadru dahuluk (vers. 29-34) situa ita iha “Pedro nia uma”. Iha Marcos nia narrasaun – ho preokupasaun katekétika forte – objetivu fundamentál mak sujere katak Jezús nia misaun konsiste iha oferese moris foun ba ema sira, vida definitiva.

Iha momentu dahuluk, Jezús kura Pedro nia banin-feto ne'ebé “iha toba-fatin ho isin-manas” (vers. 30). Epizódiu ne'e hakerek ho simplisidade no sobriedade, laho jestu boboot. Partikulár tolu destaka iha deskrisaun (vers. 31). Pormenór signifikativu dahuluk mak indikasaun katak Jezús “hakbesik an” ba Pedro nia banin. Naturalmente, inisiativa atu hakbesik an ba ema ne'ebé sai prizioneiru terus nian, moras nian, opresaun nian, inisiativa ne'e nafatin Jezús nian. Jezús mak foti inisiativa, basá misaun ne'ebé nia simu husi Aman konsiste iha realizasaun ema nia libertasaun husi buat hotu ne'ebé halo nia terus no na'ok moris husi ema. Pormenór importante daruak mosu iha indikasaun katak Jezús kaer ema moras nia liman no “halo nia hamriik”. Verbu ne'ebé evanjelista uza (verbu gregu “egueirô” – “hamriik”) mosu ho frekuénsia iha konstestu “moris-hi'as” nian (kf. Mc 5,41;6,14.16;9,27;12,26;14,28;16,6). Feto ne'e toba hakdasak ho terus ne'ebé na'ok moris husi nia, maibé ho kontaktu ho Jezús nia simu fali moris ne'ebé hanesan ho resurreisaun/moris-hi'as ida. Pormenór signifikativu datoluk mak indikasaun katak feto “hahú serví sira”. Efeito imediatu husi kontaktu ho Jezús no esperiénsia moris nian ne'ebé suli husi Nia mak atividade ne'ebé konkretiza iha servisu ba maluk sira.

Iha momentu daruak, kuadru apresenta mai ita “sidade tomak” halibur iha Pedro nia uma nia odamatan oin. “Jezús” – Marcos dehan – “kura ema barak ne'ebé iha moras oioin no duni sai diabu barak” (vers. 32-34). Ema moras no ema ne'ebé diabu tama reprezenta ema hotu ne'ebé lakon moris, ema sira ne'ebé sai prizioneiru terus nian, injustisa nian, egoísmu nian, salan nian. Evanjelista konvida ita atu haree iha Jezús Ida-ne'ebé iha podér atu hasai ema husi nia mizéria sira kle'an liu no oferese ba sira moris foun ida, moris ida livre no haksolok.

“Simão Pedro nia uma” (iha ne'ebé Jezús atua no iha ne'ebé “sidade tomak” halibur iha odamatan oin atu buka libertasaun) bele sai – iha katekeze ne'ebé Marcos propoin – representasaun ida Igreja nian. Iha ne'ebá mak Jezús oferese ba “Pedro nia família” (komunidade) moris naresin. Iha espasu familiár ida-ne'e, Jezús hakbesik An ba ema sira, liberta husi terus, fó moris definitivu no kapasita ema ba servisu maun-alin sira-nian. Ema

lubun boot ne'ebé halibur “iha odamatan” reprezenta umanidade ne'ebé buka libertasaun no moris loos no, loraun ba loraun hateke ba “Pedro nia uma” (Kreda) buka Jezús no ninia proposta libertadora.

Iha kadru daruak (vers. 35-38), Marcos apresenta mai ita Jezús ne'ebé hadook an ba fatin solitáriu/mesak iha orasaun. Orasaun halo parte Jezús nia ministériu, tama iha agenda Ninia atividade no kompromisu sira. Signifikativu katak Jezús nia atividade remata ho orasaun no katak Jezús nia atividade ba ema lubun boot sira hahú hikas fali, husi orasaun. Orasaun, ba Jezús mak, asaun nia tutun no hun/bee-matan.

Ho forma ne'e, orasaun sai mós nu'udar kondisaun atu “Reinu” bele mosu. Iha orasaun mak Jezús hetan motivasaun ba ninia asaun ba Reinu nia vantajen; iha orasaun mak Jezús hetan forsa atu sai livre husi tentasaun popularidade fasil no atu sentra hikas nia atensaun iha Maromak no Ninia projetu. Enkontru mesak ho Maromak la signifika halai husi problema sira mundu nian, maibé momentu ida enkontru ho Maromak, ho Ninia projetu no planu sira ba mundu, pontu partida nian, atu sai ba li'ur ho kompromisu ho mundu nia transformasaun. Enkontru pesoál ho Maromak signifika parajen ida iha atividade no momentu ida foti konxiénsia nian kona-ba buat ne'ebé Maromak hakarak no kompromisu ne'ebé Maromak husu ba ninia manu-ain sira.

Ita-nia testu remata ho rezumu ida, iha-ne'ebé esplika sentidu ministériu Jezús nian: husi enkontru ho aman, suli vontade foun atu konkretiza Maromak nia projetu no atua iha ema sira nia leet atu oferese ba sira libertasaun no vida definitiva. Tanba ne'e mak, bainhira Jezús hasoru fali dixípulu sira, nia prontu atu bá knua sira hotu “Galileia tomak nian, hanorin iha sinagoga sira no duni sai diabu sira” (vers. 39).

Iha testu domingu ne'e nian, Jezús nia “milagre sira” okupa espasu significativu. Maibé jestu sira-ne'e, la'ós jestu espetakulár, atu impresiona ema lubun-boot sira, maibé jestu sira-ne'e mak “sinál sira Reinu” nian. Jestu sira-ne'e hatudu ona mundu foun, iha rai-ne'e, mundu foun laho ezkluzau, laho sofrimentu, laho malisan, iha-ne'ebé ema hotu – ho forma espesial ema kiak no marjinalizadu sira – iha possibilidade atu sai haksolok. Jezús nia milagre sira haklaken katak Maromak hakarak hakiak mundu foun, tempu foun, ema foun nian, ho vida naresin no haksolok. Buat ne'e mak Jezús mai halo, no ida-ne'e mak misaun ne'ebé Jezús nia dixípulu sira tenke buka konkretiza iha rai ne'e.